

Vun driveriver

erscheint auf www.lenauheim.de

monatliche
Erscheinung

März 2014

von Helen Alba

Glicksbringer mit weiss-rote Schnier

Weil de Letschtfaschings-Samschtach grad uf de erschte März, also de Märzchentach gfall is, han sich die Mitglieder vum „Temeschwarer Liederkranz“ un der Tanzgruppe „Bunter Herbstreigen“ was Besonderes infalle gelosst: sie han e „Märzchentanz“ vorgfiehrt, ware derbei mit rot-weissi Schnier umhong un han, als Glicksbringer verkleed, Faschingslieder gsung. E Glicksbringer is eigentlich e Gegenstand, e Planz, Mensch oder Tier, dene Kräfte nohgsaat were, die Glick, Gsundheit oder Wohlstand bringe, awer a Beeses fernhalle. So sin uf der Biehne rumgetollt: vierblättrichi Kleeblätter (um Glick zu bringe, muss so e Kleeblatt zufällig gfunn were. Mer soll beim Verreise des Kleeblatt ins Gwand innähe. E Legende verzählt, dass Eva e vierblättriches Kleeblatt ausm Paradies als Andenken mitghol hat. Drum werd gsaat, dass jeder Besitzer vun so em Glicksbringer e Stick Paradies mit sich traat); de Glickspfennich is es Symbol for Reichtum; de Marienkäfer gilt als Himmelsbote der Muttergottes, er bschützt Kiner, heelt Kranki un derf niemols abgeschittelt oder sogar umgebrung were; wann mer e Hufeisen finne tut, ach des soll Glick bringe; es Glicksschwein is e Zaiche for Wohlstand un Reichtum, e Symbol for Fruchtbarkeit un Stärke. Un mit solchi Glicksbringer han die Faschingsnarre symbolisch alli Anwesende Glick un Zufriedenheit schenke wille.

Seniore turne um die Wett

Eva Paul is Turnlehrerin im AMG-Altenheim. Was sie mit eem Teel vun de Altenheimbewohner uf die Biehne gebrung hat, des war bemerkens- un loweswert. Sie han scheen angezoo, mit Masken ufm Kopp, uf Stiehl gsitzt un ihre Turniewunge mit Händ, Fieß un Kepp vorgewiess, zum Schluss sogar seideni Kopptiechle gschwenkt.

„Schirmtänzerinne“ bringe Schwung in die Bude

Jetz ware die weibliche Angestellte vum AMG-Altenheim an der Reih, for schwungvolli Faschingsstimmung zu sorche. In schwarze Strumphose un Blusne mit blumichem Kraa un Minireck, in der Hand mit farwiche Reenschirme un Perücken uf em Kopp, han se moderni Rythmen getanzt. Es war wie bei eener Großveranstaltung, weil sogar kinschtliche Raach is uf die Biehne geblost un mit Faschingsfitter un Konfetti geknallt gin.

Pflegerin mit Trillerpheif

Uf des bekannti Lied „Oma so lieb, Oma so nett“ sin zuletscht e Pflegerin mit Trillerpheif un ihre sechs „Altenheim-Schitzlinge“ in Nachthimiter un Zipfelmütze inmaschiert. Natierlich ware alli sechs „krallewatschich un behindert“. Wie se endlich uf der Biehne ghuckt han, is gewies wore, wie „Sparmaßnahmen im Altenheim“ ausschae. Erschter Pfiff: Schampodlichi Kniehose runer; dernoh han sich alli sechs mit demselwe Lappe wäsche un an ihre Himiter abputze misse. Noh em Zähntputze han alli mitm gleiche Schluck Wasser gegurgelt; ach an Klopapier is gspart gin. Die „herzlosi“ Pflegerin hat alli beschtens im Griff ghat. Es Lache un Towe im Saal war de Beweis derfor, dass es de Leit stark gfall hat.